

四庫全書

集部

欽定四庫全書

集部

誠意伯文集卷一

詳校官中書臣呂光復

中書臣劉源溥覆勘

總校官編修臣王燕緒

校對官編修臣秦泉

謄錄監生臣秦鴻甲

欽定四庫全書

集部六

誠意伯文集

別集類五明

提要

臣等謹案誠意伯文集二十卷明劉基撰基有國初禮賢錄已著錄其詩文禱著凡郁離子四卷覆瓿集十卷寫情集二卷春秋明經二卷犁眉集二卷本各自為書成化中浙江察院重為刊板始合為一帙而冠以基孫鷹

等所撰翊運錄蓋以中載詔旨制敕故列之
卷首然其書究屬鷹作用以編入卷數使此
集標基之名而開卷乃他人之書殊乖體例
今移綴是錄於末簡以正其訛餘十九卷則
悉仍原次以存其舊基遭逢興運參預帷幄
秘計深謀多所裨贊世遂謬謂為前知凡識
緯術數之說一切附會於基神怪謬妄無所
不至方技家遞相熒惑百無一真惟此一集

尚實出基手其詩沈鬱頓挫自成一家足與
高啟相抗其文闕深肅括亦宋濂王禕之亞
楊守陳序謂子房之策不見詞章元齡之文
僅辨符檄未見樹開國之勲業而兼傳世之
文章可謂千古文豪斯言允矣大抵其學問
智略如耶律楚材劉秉忠而文章則非二人
所及也乾隆四十六年四月恭校上

總纂官臣紀昀陸錫熊臣孫士毅

總校官臣陸費墀

誠意伯文集序

國初誠意伯劉公伯溫嘗著郁離子五卷覆瓿集并拾遺二十卷犁眉公集五卷寫情集暨春秋明經各四卷其孫薦集御書及狀序諸作曰翊運錄皆錄梓行世然諸集渙而無統板畫久而浸湮學者病之巡浙御史戴君用與其家薛君謙楊君琅謀重鋟廼錄善本次第諸集而冠以翊運錄俾杭郡守張君僖成之屬守陳序維公以命世豪傑之才出佐我高皇剪羣雄混六合讜言

鉉議牖道天衷偉略奇謀指授羣帥者鼎彝勒之汗青
書之四方尚能道之方其未遇也鬱積感憤發之大辭
若四嶽之出雲無窮若公輸之營衆宇各盡其制若孫
武子之師戈甲蔽野而不聞喑鳴叱咤之聲若大海浩
漭中畜虬螭鯢鱣鼉鼉之屬覩者眙眙而莫能名然皆
載道之航輪濟世之梁帛時已傳誦之及達而施之朝
廟播之華夷垂之百世之下焯乎不可朽也三代之英
卓矣漢以降佐命元勳多崛起草莽甲兵間諳文墨者

殊鮮子房之策不見辭章元齡之文僅辨符檄未見樹
開國之勲業而無傳世之文章如公者公可謂千古之
人豪矣而世或疑其仕元或獨稱其觀象者是猶訾伊
尹之五就知周公止於才藝而已不亦陋乎三御史之
重黜茲集蓋高山景行之志也守陳之序居培塿而論
高低持土苴而寘之夜光朝采之上可乎哉成化六年
夏六月四明楊守陳序

欽定四庫全書

誠意伯文集卷一

覆瓿集一

古賦

述志賦

鮮余生之眇眇兮荷后皇之深仁具五氣以成形兮受
明命而為人體乾坤之粹精兮晞日月之景光漱飛泉

明
劉基
撰

之華滋兮浥灝露之醇英製杜蘅以為衣兮藉芷若之
菲菲佩琳瑯之玲瓏兮帶文藻之葳蕤朝濯髮于蘭池
兮夕偃息乎瓊苑願馳騫以遠遊兮及白日之未晚駕
輕輶之將將兮服蒼虬之駢駢遵大路以周流兮曳虹
蜺之委蛇狹長離而察鵷兮欸閭闔之九門豐隆為余
先導兮百靈為余駿奔前燭陰以啟途兮颺凱風使清
埃覲北斗于文昌兮朝玉皇于帝臺食玄圃之丹莢兮
澡天潢之芳津激微焱于桂枝兮輕波起而龍鱗清都

不可以久留兮忽乘雲而遐征浮江湖之浩茫兮陵山
嶽之崢嶸野莽蒼以多榛兮路險隘而紆曲猓猓然
而攫噬兮蝮蛇蜿蜒以當陸鬱忡忡以怵惕兮適皇皇
以營營雨淫淫而不止兮霧黯黯以晝冥烏鳶號以成
羣兮鳳孤棲而無所楚屈原之獨醒兮衆皆以之為咎
欲振迅以高舉兮無六翩以奮飛將抑志以從俗兮非
余心之所怡長太息以增歎兮哀時世之異常棄韶夏
而非聽兮登傑休于中堂芘軒于以和羹兮腌鮑魚而

實俎斯梗楠以給爨兮束荊棘而為柱施罾麗于丘陵
兮怨魴鯉之弗獲虎兕送于山林兮循戶庭以求索前
蒙眊以指途兮彊揚子使操轅命侏儒令舉鼎兮別都
盧使守閹歲冉冉而將頽兮日曖曖以就昧松柏摧而
根死兮江河化而為澮秣余馬于不周兮整余轡於樊
桐無著龜以決疑兮迷不知余所從搏扶搖以為輿兮
攬列缺以為輶騶青鸞之芟芟兮起烟靄而上浮梁天
津以濟河兮睇紫微之神闕開明怒目而電視兮貌豹

吼而山裂進無人以為之先容兮欲自獻而不敢氣勃
鬱以憑中兮心惻惕以懔懔過少微而歷明堂兮就軒
轅而陳情雷霆砰其隱轡兮馬辟易而不行訪六符于
泰階兮求民極之所在咎繇不可以作兮競狂直以為
罪凌天街以徑度兮造旬始而瞻西清衆畏讒而卷舌
兮孰能白予之忠誠怙愾其無止兮然悄悄以狐疑要
傳說于箕尾兮命靈龜使占之曰有名必有實兮若形
影之相因想福極出自天兮又何尤乎世之人鼎胡時

而不烹兮旗胡張而弗麾弧不可以射侯兮馱不可以
策而馳衆蠕蠕以朵頤兮若頽波之東趨謂翬翟爲弗
章兮愛羸豕之負塗方不可利而規兮白不可涅而黑
悲桂椒之芬芳兮與朝菌而偕落殷比干之剖心兮時
豈不知其爲聖人魯仲尼之過化兮焉役役而無所容
其身由彊義而罹殃兮惠直道而彼黜子胥忠而殞命
兮伯夷清而不食將登山而迷路兮欲涉水而無航東
西南北安所之兮顧焉擇其所長神冥冥而不下兮龜

又厭而弗告思糾結而不抽兮意恍惚以震悼忽濫汜
以遐舉兮行遊目於大荒羲和不可扳而留兮恐年歲
之弗將駕廣漠而南征兮叫重華于九疑山岑岑以蔽
天兮江淼淼而不可窺邇吾道夫西陲兮聽鳴鳳于岐
陽慨永泰之離離兮梧桐摧而不生浮龍門以沂河兮
訪夏后之遺跡川瀆混而不分兮鯨鯢起而人立攬騑
轡而迴驚兮謁陶唐之舊京無衣裳以禦寒兮哀蟋蟀
之悲鳴心悵悵以增傷兮神夢夢其若醉淚洛洛以交

流兮憂湛湛而來會傳說之版築兮無武丁其誰舉夷
吾不逢夫鮑叔兮竟淪沒于囹圄推竭心以服勤兮上
介山而立枯種霸越而滅吳兮終刎頸于屬鏹樂毅升
于金臺兮何遁逃而走趙周條侯之耿介兮卒含怨以
餓餒忠有蔽而不昭兮道有塞而不行名不可彊而立
兮功不可期而成李斯上書以相秦兮空自陷於罪尤
買臣顯而倖辱兮宜如負薪之無憂魚赴餌以中鈎兮
雉慕媒而膺鎬鳳凰翔于丹穴兮又何患乎矰弋返余

旆之旖旎兮還余車之鞶鞶采薇蔽于山阿兮擷芹藻
于水濱冽玄泉以瑩心兮坐素石以怡情聆嚶鳴之悅
豫兮翫卉木之敷榮挹清風之泠泠兮照秋月之娟娟
登高丘以詠歌兮聊逍遙以永年

弔諸葛武侯賦

天地閉塞兮聖賢隱淪大旱焦土兮龍無所用其神當
運命之厄窮兮堯舜且猶有極委厥軀以隨化兮亦哲
人之所戚彼狂猾之縱悖兮履羿莽以滔天亂倫汨典

兮流毒為淵夏少康之不作兮時又無湯與武蕨薇不
可以食兮焉眾眾而獨處睠三顧之疑惘兮蹠高光之
所為鳳凰非梧桐不棲兮予嗟去此其安歸瞻星芒于
渭濱兮宣皇天之叛渙日昃不可使再中兮指桓靈而
慨歎昔尼父之不逢兮寓斧鉞于春秋誅姦邪於既死
兮開日月之昧幽般紛紛以攘奪兮世不以之為殃民
彝泯滅猶一髮兮微斯人其孰明覽出師之遺表兮涕
淫淫其如雨悲逝者之不回兮邈英風于萬古

弔祖豫州賦

汙池汀滸兮蛙黽樂之大鵬天遊兮燕雀謂女奚為狐
狸冠裳兮梟獍堂宇支離節䟽兮側身無所嗚呼將軍
兮管葛之倫遭逢庸愚兮有志莫伸委棄九鼎兮烹飪
瓦釜截梁為杙兮束椽為柱面背泰山兮依倚培塿圭
璋砢砢兮沙礫瓊玖山陵暴骨兮社稷黍離故臣酸嘶
兮行人涕洟卧薪嘗膽兮此維時矣宣光不作兮吁其
悲矣烏號之徹札兮無養由以操之驂騑不逢伯樂兮

與駑駘而並馳系曰龍噓而雲兮夫豈不能自翔鴻鵠
舉翮而千里兮又何必懷此鄉魚遊思故淵兮鳥棲思
故林吾固知將軍之不忍兮惜庸夫之無心日曖曖以
西傾兮時靡靡而就逝雁驚羣而喋呶兮鸞鳳反為所
制世治亂之有數兮天亦無如之何也匪將軍之不能
兮惜不幸而逢此時也死有重於泰山兮繫生民之休
戚吾獨悲夫將軍兮仰玄穹而太息

弔岳將軍賦

木之顛兮其根必傷人之將死兮俞扁以為不祥嗚呼
將軍夫何為哉天地易位兮江河倒流鳳凰天殤兮豺
狼冕旒臣不知有其君兮子不知其有父嗚呼將軍兮
獨銜冤而懷苦讐何愛而可親兮忠何辜而可戮父兄
且猶不顧兮何忠良之能育臣竭心以為主兮又何可
以為仇也天之所廢不可植兮亦將軍之尤也烏傷弓
而欲殞兮羣啞啞而拊翼猿獐縻于機檻兮羈悲鳴而
不食相伊人之有心兮曾鳥獸之不如忘戴天之大恥

兮安峻宇而高居信讒邪之矯枉兮委九廟于狐狸甘
卑辭以臣妾兮苟殘喘以娛嬉焚舟楫于洪流兮烹驛
騶于中路庸夫亦知其至愚兮羌獨迷而弗寤捐薄軀
以報主兮乃忠臣之素心縱狂瞽之弗思兮又何必以
之為禽屈原貞而見逐兮伍子忠而獲戾固將軍之不
辰兮哀中原之蕪穢弔孤墳于湖濱兮見思陵之牛羊
寄遙情于悲歌兮識忘親之不臧

弔台布哈元帥賦

世有作忠以致怨兮曾不知其故然懷先生之耿介兮
遭時命之可憐上靡蔽而不昭兮下貪婪而不貞權不
能以自制兮謀不能以獨成進欲陳而無階兮退欲往
而無路忠沈沈而不白兮心搖搖而不固繫乘黃服鼓
車兮驂蹇驢以曳之冒猛虎于籠檻兮狐狸羣而制之
衆刻木之枉直兮信讒邪之流言倒裳以為衣兮涅素
以為玄前宕冥令指途兮驅離婁使從之教養由以彎
弧兮繫其肘而引之吁嗟先生兮何逢時之不辰生不

能遂其心兮死又抑而不伸姦何為而可長兮忠何為而可尤尸比干而獎惡來兮白日為之昧幽重曰嗚呼哀哉吾安歸乎猘猱升堂兮騶虞以為妖殪鳳凰而斲麒麟兮康梁肉以養梟吠狗遭烹兮捕猫蒙醢雄鷄晨鳴兮衆以為罪忠固不求人知兮於先生其何傷國有忠而不知兮喟皇天之不祥亂曰莽莽崇立閭無人兮天高聽遐疏不得親兮松柏摧折荆棘長兮軒于葦菹充佩纓兮浮雲虹蜺紛縱橫兮上下阻隔幽不能明兮

嗟苦先生卒罹殃兮姦邪矯枉歸罪愆兮咎繇不作誰
與平兮跖犬噬由理則然兮麒麟豺狼不同羣兮自古
有之吾又何嗟兮

伐寄生賦

并序

余山居樹羣木嘉果駢植人事錯迕斤斧不修野鳥棲
息糞其上茁異類日夕滋長舊本就悴余覩而悲之乃
募趨捷腰斧鑿升其巔剝條剔根聚其遺而燔之於是
老幹挺立新莖濯如若瘡瘍脫身大姦去國斧鉞之時

用大矣哉作伐寄生賦

天生五材兮資土而成汝獨何為兮附麗以生疣贅蛭
嘬兮枝牽蔓縈瘠人以肥已兮偷以長榮狀似小人之
竊據兮謂城社之可憑觀其陰不庇物材匪中器華不
羞于几筵實不諧於五味來烏烏之呢聒集虫豸以刺
蚝果被之而實萎卉蒙之而本悴壇杏無所容芬芳甘
棠曷能成其蔽芾亶無庸而有害矧睚眦之可置爾乃
建修竿升木末運斤生風以翦以伐脫纏牽於喬竦落

纖蕤之騷屑剝鮮膚以除根斲去毒而刮骨於是巨蠹
既夷新莢載蕃迎春而碧葉雲滄望秋而碩果星繁信
知谷鉞之神用寧能裕蠱以生患也耶嗟夫農植嘉穀
惡草是芟物猶如此人何以堪獨不聞夫三桓競爽魯
君如寄田氏厚施姜陳易位大賈入秦柏翳以亡園謀
既售半化為黃蠹憑木以槁木姦憑國以盜國鬼居盲
而人殞梟寄巢而母食堅冰戒乎履霜羸豕防其躅躑
諒前轍之昭昭何人心之自惑故曰非其種者鋤而去

之信斯言之可則

騷

九歎九首

秋風起兮夕露漙浮雲沉陰兮白日晝寒木葉落兮水
泉乾孤雁鳴兮悽以酸攬余轡兮悵盤桓野蕭條兮行
路難豺狼驕兮狐兎頑蘭蕙死兮荆棘蕃我欲奮飛兮
無羽翰援雅琴兮發哀彈絃斷絕兮涕汎瀾

我髮種種兮颯如其稀我心悵悵兮忽若有遺過吾不

能改兮德吾不能知往者不可悔兮來者不可期進無
益于世兮退將安歸嗚呼已矣兮吾寧不悲

天有田兮不可以耕山有龜兮不可以知咎徵剡蒿以
為梁兮削菌以居楹匠石却走兮工垂拊膺登高望遠
兮觀四瀛水東流兮日西傾般紛紛兮各有營我獨展
轉兮從夜達明

風飄飄兮揚塵野寂寞兮無人舟何為兮山阿車何為
兮水濱北望楚兮東望秦倒江河兮亂星辰天門窈窕

分重九闋願有言兮遠莫陳虎豹颺颺兮為喜為瞋橫
流涕兮瞻蒼旻心馮噫兮不能伸麋有角兮龍有鱗空
山寥寥兮吾誰與鄰

江無舟兮河無梁隰有荆棘兮而無稻梁鷹化鳩兮雀
變隼狸為貙分龍為蜥蜴長顧兮情紆軫九疑高兮禹
穴幽梧桐枯兮鳳不留山木慘慘兮叫鵲鵲鴻鵠飛兮
無所投雲沓沓兮雨悠悠孰懷情兮知此愁

虎厭肉兮騶虞苦飢獺升堂兮麒麟受羈黃犢薦滸兮

章甫承綦箭韶屏棄兮絃筦兜離指玉以為石兮削方
以為規天不可問兮神不可咨繫彼之是兮而此之非
有樗在林兮有櫟在廬著龜孔昭兮勿遠余思

今夕何夕兮天宇清步逍遙兮仰觀列星河漢皎兮北
斗橫悲風發兮候虫鳴林鳥起兮沙鷀驚長夜寥寥兮
何人哭聲愴怳恨兮不忍聽回身入房兮淚沾纓蛟虬
偃蹇兮豺虎獐弧無弦兮車說其衡知不可慮兮誰女
令蹇淹留兮難為情

履霜思裘兮燠則棄之臨河號舟兮濟而置之不網胡
魚兮不弋胡鵠翦薙杞梓兮索灌莽以取木捕猫乳鼠
兮僉以為仁吠狗宵警兮行者怒瞋彈鸞養梟莫知其
咎斲氷以承宮兮曷云能久長太息兮有所思林木動
兮巢鳥悲山有藿兮園有葵心懷君兮君不知

秋天沈淪兮百草黃螻蛄悲吟兮朝榮有芳屣履起兮
獨彷徨心悠悠兮懷故鄉原有粟兮隰有禾桂花紅兮
蘭紫芽涼風動兮松柏馨流潦落兮水泉清蔬可茹兮

秫可酒集鄉里兮會親友坐白日兮蔭蒼筠翫明月兮
思古人魚歸淵兮狐首丘終余生兮安所求

秋日慘淡

秋日慘淡兮秋風其颼白露既下兮繁霜繼之葉離其
根兮葉脫其枝丰者黝顏兮柔者就萎登高望遠兮涕
泗滂沱松柏希少兮蒲柳何多露不盈條兮霜晨以晞
歲晏玄冰兮知將奈何

思歸引

山高高兮可以望四荒胡躋爾巔兮而不見我故鄉歲
云莫兮無衣裳車罷馬羸兮僕夫頓僵水有蛟鰐兮陸
有虎狼于嗟奈何兮惟懷永傷

松筠軒歌

彼松之高兮矯吾以其操兮此竹之節兮耿吾以其潔
兮露溥溥兮宵明烟霏霏兮曉清風聲我琴兮鳴鸛我
笙繼胡為兮我衣塵胡為兮我纓聽兮聽窈兮幽驂
青鸞兮服蒼虬吾與元氣兮升降與雲霞兮綢繆逍遙

兮相羊終吾生兮樂以忘憂

漁父歌

江之水兮悠悠深有鱸鯉兮淺有鯊與鯪檜為楫兮松
為舟其釣伊緡兮人誰女尤江之水兮娟娟蒹葭吟風
兮楊柳含烟有鮪在穴兮有魴在淵其釣伊絲兮人誰
女愆江之水兮浪浪泳之沄沄兮浮之洋洋有魚與鰕
兮可釣以網無遐爾思兮人誰女傷

麥舟圖歌

我馬飽粟兮彼食不選
批糠我麥滿舟兮彼無以送其
死亡我忽見兮哀不能忘
推以與之兮我心乃康
我聞在昔兮有虞夏商
一夫百畝兮家有稻與粱
生不餓殍兮死有藏
嗚呼兮不得見兮使我心傷

山陰王景回友樵齋辭

稻粱離離兮稂莠驕驕
麟不可以偶狼兮鳳不可以侶
梟求羊無人兮鍾子寂寥
哀風鬱發兮原野蕭條
四顧彷徨兮憂心且焦
若有人兮在山椒
攜糧負薪兮嘯歌

以遨黜陟無聞兮寵辱不搖嗚呼吾爾羣兮去無待子
招臨流泉兮倚逍遙無斤我松兮無使柏也凋

柳橋漁唱二首為黃中立作

春風淡淡兮湖水波柳垂橋兮青烟滿莎扣予舷兮發
長歌靡白蘋兮亂駕鵝前有蛟兮後有鼉予往予還兮
吁予奈何

彼湖有波兮此橋有柳我維我舟兮聊以搔我首放歌
逍遙兮哀莫予偶有籜在罾兮有沙在留逝者滔滔兮

羌不可以久綠蘋兮菲菲落花兮點衣江無津兮海無涯
嗚呼寂寥兮吾誰與歸

獲麟操

有獸維麟兮獵者獲之折肢毀膚兮曾不如鹿與麋嗚呼
哀哉兮爾何生于此時周公已矣兮吾能不悲

在陳操

彼山有楊兮彼隰有柏彼路斯何兮孔棘且阻玄雲杳
冥兮不日以雨重華寂寥兮誰與晤語茫茫九州兮孰

為予所龜蒙無人兮駕予歸處

白雲歌為良上人作

用貞上人以白雲隱居名其舍蓋取諸唐狄公之言以寓其思親之意括蒼劉基為之歌曰

青山兮翠微白雲兮孤飛悵遊子兮遠于離不如雲兮
條往而歸白雲兮容與青山兮欲雨懷予親兮在雲之
下雲兮雲兮歸予從女

秋山圖歌

秋風起兮蕭蕭望青山兮寂寥水泠泠兮出石葉槭槭
兮辭條氣悽悽兮就寒夜耿耿兮不朝鳳凰兮安之梧
桐兮早凋思美人兮隔江河玄雲冥兮天路遙託宵夢
兮遠徂征款扶桑兮倚消搖盼青離兮不來愴悵恨兮
魂屢飄願乘風兮絕浮雲要洪崖兮訪子喬高無梯兮
深無航龜鼉陸梁兮虎豹驕歸來兮歸來紫芝有萸兮
黃精有苗

梁孝子廬墓詞

并序

梁君天民思其父母而廬于墓將終身焉夫廬墓非古禮也然人子之情有不能已而自我為之君子不非焉或乃狀其景物而詠歌之則悖於禮而非孝子之本心矣故為之作楚語使梁君聞之必愀然悲曰他人有心予忖度之夫子之謂也不其庶乎其詞曰

陟彼岵兮望父陟彼屺兮望母若儀容兮在前恍音聲兮在後陟彼屺兮望母陟彼岵兮望父惆恍惘兮無聞心搖搖兮愁苦聞空廬兮山之巔朝松有嵐兮暮蘿有

烟其下維地兮其上維天食思寢思兮以日以年嗚呼
魂乎其有知兮矢相從於九泉

送龍門子入仙華山辭

龍門先生既辭辟命將去入仙華山為道士而達官有
邀止之者予弱冠嬰疾習懶不能事嘗愛老氏清淨亦
欲作道士未遂聞先生之言則大喜因歌以速其行先
生行吾亦從此往矣他日道成為列仙無相忘也其辭

曰

青山崔嵬兮烟雲杳冥回溪鬱紆兮巖谷晦明修篁雜
樹兮相蔽虧洞壑窈窕兮人不知清猿警夜兮鶴報晨
花開鳥啼兮長如春隰有芷兮陵有苕美人不來兮山
寂寥瓊芝兮玉華丹萸兮翠葩紫葛兮黃精礪礪兮鬢
髣蜚梁連蜷兮登降列窈幽溇閭礪兮敞晃譎詭芳蘭
桂椒兮或紅或紫松風澗泉兮金石盈耳梧桐萋萋兮
竹實葢葢鳳凰翔鳴兮五色卉煒望美人兮翠微空山
寂寥兮遲爾來歸霓為衣兮霞為裳飲沆瀣兮食瑤漿

晞正陽兮澡淪陰精神完兮毛髮香握六符兮躡九靈被
喬雲兮歌洞章御扶搖兮歛天門詣北斗兮覲虛皇超
鴻濛兮軼希夷造無始兮逍遙娛召秦女兮吹簫使湘
娥兮彈絲洪崖嘯歌兮王母啟齒萬舞齊進兮襟佩颯
纚長離前驅兮鸞鳥為使蒼龍駢駢兮白虎牙牙雷公
磅礴兮列缺叱咤登明堂兮絕河津上閭道兮攀勾陳
過三危兮繞玄冥出太微兮入西清憩牛渚兮泛靈槎
乘回飈兮以還家美人兮歸來山中兮其樂無涯

王彥中哀辭

王氏二子者故宋給事中信之闕世孫也長曰鍾字彥
中次曰錡字彥和是同母一乳而生二子焉及長俱好
學能文詞至正癸巳其長以春秋經魁鄉貢次榜行省
銓授建德路學錄未幾以力學得疾至丁酉四月卒鄉
人咸痛惜之蓋期其成而不意止于斯也其弟悲哭不
能自勝於是元帥石末公聞之為詩以弔且唁而劉基
為文以哀之其辭曰

朝出兮雁行暮歸兮相將聯綵服兮上高堂棣華莽兮
親樂康忽秋霜兮夏零淒風發兮凋紫荆同氣兩身兮
一死一生車隻其輪兮嗟何以行窈窕兮悵悵想形容
兮不可尋飲泣兮吞聲恐慈親兮傷心俯重泉兮永隔
掩此哀兮何極盡禮事生兮怡恭子職是謂孝友兮死
者瞑目

古樂府

艾如張

有苑者林衆鳥萃之我欲張羅榛楛翳之既礪我斧又
飭我徒孰是與穢而不剪除爰升于虛以相乃麓有條
我網載秩我目有鳥有鳥五采其章嚙嚙啗啗率彼高
岡張之弗獲憂心且傷寤寐懷思曷云能忘有鳥五采
亦既來止昭其德音以相君子君子宣弟其儀是若艾
而張矣云胡不樂

芳樹

蔚彼芳樹生于蘭池景風晝拂榮泉夜滋煜如其光炫

于朱曦含華吐芬嚶鳴滿枝君子有酒以遨以嬉羽觴
交橫吹竹彈絲相彼草木允惟厥時良辰易徂能不懷
思沛其邁矣其誰女悲

上陵

零雨霏霏亦降于桑愴恨中懷念昔先皇惟昔先皇創
業孔艱寤寐興懷能不永歎精靈安所體魄焉依幽明
隔絕曷已其思堂堂梓宮在彼高岡霜露是萃能不慨
傷禮起由情將情繫物溥斯索矣庶其罔闕郊社既虔

宗廟孔威上陵是申式昭孝思

將進酒

有酒湛湛亦盈于觴酌言進之思心洋洋亦有兄弟在
天一方安得致之樂以徜徉有酒在尊既旨且清何以
酌之有觶其觥豈不欲飲惜無友生愴恨傷懷曷云其
平兄弟之合如埴如篴朋友既比如岡如維死喪急難
是責是疵今日有酒如何勿思人亦有言解憂惟酒載
懽載呶亦孔之咎我觴維瓊我掌維玖以樂兄弟以宴

朋友

上之回

上之回六龍矯捷光耀拂鷺鳥輶石關匝棠梨揚靈旗
縣月支天馬來宛居劉穆上玄釐穰穰坐明堂朝萬方
翕披離玉燭光於億年樂未央

朱鷺

朱鷺來玉山巔顏翁引燦臆延朱鷺來絕流赧飲赤水
食丹砂朱鷺來炎德加威昆明滇焚訛朱鷺來集太液

帝錫祐荒廣斥朱鷺來輝煌煌挾鷖鵬媒鳳凰朱鷺來
皇之輝神筵演無窮期

巫山高

巫山高哉鬱崔嵬下有江漢浮天回深林日月照不到
洞谷闔闔生風雷危峯半出赤道上落日猿狖鳴聲哀
虎牙赤甲鬬雄壯風氣以之而隔闕楚王遺跡安在哉
但見麋鹿跳蒿萊當時忠臣放澤畔乃與靳尚相徘徊
山中妖狐老不死化作婦女蓮花腮潛形譎跡託夢寐

變幻涕泪成瓊瑰神靈震怒不可禱雲霧慘淡昏陽臺
猛風吹雨洗不盡假手秦炬歟飛灰精誠感應各以類
世間妖孽匪自來君不見商王夢中得良弼傅巖之美
本安匹巫山何事近楚宮終古怨恨流無窮

戰城南

朝戰城南門暮戰城北郭殺氣高衝白日昏劍光直射
旄頭落聖人以五服限夷夏射獵耕織各自安土風胡
為彼狂不自顧而與大國爭長雄高帝定天下遺此平

城憂陛下宵旰不遑食擁旄仗鉞臣不羞登南城望北
土雲茫茫土膺膺蚩尤禡牙雷擊鼓舉長戟揮天狼休
屠日逐渾邪王羶車尾尾連馬羊橐駝載金人照耀紅
日光逍遙而來歸帝鄉歸帝鄉樂熙熙際天所覆罔不
來小臣獻凱未央殿陛下垂拱安無為

君馬黃

君馬黃我馬驪二馬八足爭驅馳回頭顧影雙驕嘶尾
端散作頰虹飛黃馬曜日黃金晶驪馬謂是玄天精眼

前好醜那能明吾聞良驥稱以德不聞矜此驪黃色世
無伯樂識者誰有德無色空自知

思悲翁

弱齡輕日月邁景想神仙顧往諒無及待來徒自憐黃
金棄砂礫劬心鍊丹鉛鑿石不得水沈劍徒窺淵流光
不我與白髮盈華顛杖策出門去十步九不前歸來對
妻子塵竈午未烟干時乏計策退畊無園田霜蒲怨青
松逝矢恨驚弦已矣復何道吞聲赴黃泉

聖人出

聖人出臨萬方赤若白日登扶桑陰靈韜精星滅芒羣
氛辟易歸大荒晦暖寒谷熙春陽枯根發茁暢幽藏潛
魚躍波谷鳥翔花明草暖青天長青天長聖人壽北斗
軒轅調氣候北辰中居環列宿八風應律九歌奏圓方
交格神靈轅聖人出陽道開億萬年歌康哉

釣竿

斫竹作釣竿抽蠶作釣絲滄洲日暖波連漪綠蒲茸茸

金史卷一百一十五
卷一
柳葉垂鈎纖餌香魚不知石鱗激水溪毛動玉燕迴翔
竿尾重大魚入饌腮頰紅小魚却放淵沚中更祝小魚
知我意長逝深潭莫貪餌

思美人

雨欲來風蕭蕭披桂枝拂陵苕繁英隕鮮葉飄揚烟埃
靡招搖激房帷發綺綃中髮膚惜寂寥思美人隔青霄
水渺茫山峒崑雲中鳥何脩脩欲寄書天路遙東逝川
不可邀芳蘭花日夜凋掩瑤琴閑玉蕭魂裊裊心搖搖

望明月歌且謠聊逍遙永今宵

關山月

關山月明風惻惻萬里黃雲雜沙礫夜深羌笛吹一聲
征人相看淚沾臆古人以綏服奮武衛耕戰守禦不外
求何人倡此戍邊策千載以貽中國憂關山月圓復缺
何忍年年照離別願得馳光照明主莫遣邊人望鄉苦

楚妃歎

江漢揚波六千里上有巫山矗天起錦衾一夕夢行雲

萬戶千門冷如水聞道秦兵下武關君王留連猶未還
山深不見章臺殿汨羅冤淚空潺湲尚憶前王好馳逐
宮中美人不食肉回狂作哲須臾間至今相業歸孫叔
楚宮無復如昔人況有神女如花新悲來恨新還憶故
誰能斷却巫山路

王子喬

王子喬乃是鬚王之子皇王之孫深宮洞房不稱意却
駕白鶴尋軒轅虹蜺為旂雲為旛飄然乘風上崑崙王

子喬去何之朝發暘谷暮崦嵫六龍九鳳相追隨穆王
西上不得王母訣胡為元氣獨爾私王子喬去不還后
稷功業委如山猶有九鼎知神姦王城日夕生茆菅爾
獨胡為白雲間王子喬空長歎

走馬引

天冥冥雲濛濛當天白日中貫虹壯士拔劍出門去手
提仇頭擲草中擲草中血漉漉追兵夜至深谷伏精誠
感天天心哀太一乃遣天馬從天來揮霍雷電揚風埃

壯士呼天馬馳橫行白晝更不敢窺戴天之恥自古有
必報天地亦與相扶持夫差徒能不忘而報越棲於會
稽又縱之始知壯士獨無媿魯莊嵇紹何以為人為

結交行

朋友以義合久要貴不忘結交或匪人駒虞化為狼君
不見市井人盃酒忽相得傾肝瀉膽無所惜一朝需求
不稱意口裏驅蛭心上虵更聞背語觸疑心牆角車輪
亦生翅君不見耳與餘又不見田與竇當其得意時勿

頸以相就寧知嫌隙反掌成坐令衽席生戈兵古人重
結交晏子真其人伋文執誼羊豕之合死生棄置安足
陳

梁甫吟

誰謂秋月明蔽之不必一尺雲誰謂江水清湑之不必
一斗泥人情旦暮有翻覆平地倏忽成山谿君不見桓
公相仲父豎刁終亂齊秦穆信逢孫遂違百里奚赤符
天子明見萬里外乃以惹茲為文犀停婚仆碑何震怒

青天白日生虹蜺
明良際會有如此而況童角不辨粟
與稊外間皇父中豔妻馬角突兀連牝雞
以聰為聾狂作聖顛倒衣裳行
蒺藜屈原懷沙子胥棄魑魅叫嘯風
淒淒梁甫吟悲以悽岐山竹實日稀少
鳳皇憔悴將安棲

春日行

白日出東陸垂光曜中天大哉至陽德
蕩蕩無頗偏坐令慘烈化滋潤頃刻枯槁
回鮮妍聖人法天道神化參

玄微春朝著典禮上下同光暉垂衣向明物自育帝力
皞皞無人知春天和春日麗但願宇宙長如春聖明天
子千萬歲

牆上難為趨行

弱水不可以航石林不可以車人生貴守分牆上難為
趨茫茫八極內狹徑交通衢紛紛皆轍迹擾擾論鎬銖
焦原詫齊踵龍頷夸探珠片言取卿相盃酒興剪屠機
事一朝露妻子化為魚林間有一士蓬蒿翳窮廬種稻

金方月入
卷一
十數畝種桑八九株有酒且飲之無事即安居孰知五
鼎食聊保百年軀悠悠身後事汲汲復何如

少年行

駿馬狐白裘玉勒黃金羈賓從如浮雲顧盼生光輝朝
驅紫陌塵暮醉青樓姬但見花月好寧知霜雪飛荏苒
世途異淒涼瑤草裛園田皆易主親友盡睽違學書時
既晚躬稼力已微歲晏寒風生倚牆聽隣機逝水不可
挽枯蓬安所依佇立為爾歎感我淚沾衣

獨漉篇

獨漉復獨漉月明江水濁水濁迷龍魚月明復何如楚
國皆濁屈原獨清行吟澤畔哀哉不平上山采茶下山
采藥心在腹中何由可白豺狼在後虎豹在前四顧無
人魂飛上天珠玉委棄不如泥沙躡冠戴履萬古悲嗟

懊懷歌

白惡養雛時夜夜啼達曙如何羽翼成各自東西去
昨夜霜風起入戶復吹帷兒啼母心酸母愁兒不知

養兒徒養老無兒生煩惱臨老不見兒不如無兒好
食藥苦在口食蓮苦在心苦心無人知苦口淚沾襟
男兒初生時蓬矢桑弧弓老大却思家懊惱無終窮

王昭君

漢庭不賞微功士昭君却向胡中死昭君辭漢入胡中
胡女悲愁漢嬪喜含情欲怨當語誰手彈琵琶淚沾衣
掖庭望幸從此絕巫山有路他生歸殷勤說與上林雁
好在明年再相見漢恩如海長自深妾自生來命如綫

賤妾一身何足惜
可惜當年劉敬策
遂令上策重和親
欲倚紅顏清塞塵
只恐妾身先草露
漢宮無復如花人

塘上行

塘上何所有
有蒲與荷花
蒲花難開荷
易落使我歎
恨長咨嗟
鴛鴦戲我後
鸛鵒翔我前
四顧不見人
淚下如流泉
浮萍遠淥井
寄身滄江渚
滄江不應竭
是妾命如許
朝淚灑玉臺
夕淚沾羅衾
采荷得見蓮
中復懷苦心
廣筵列肴蔬
好者即美味
茶蓼有時甘
菰葵有時棄
嚴

金匱要略卷一
風吹秋林蕙蘭化為草菸悵今可憎芳菲故嘗好行亦
私自憐坐亦私自憐願為天邊月流影玉堦前

君子有所思

晨上龍首山徘徊望咸京交衢錯萬井甲第連公卿鞍
馬相照曜冠蓋如雲行扈從金輿歸賜酒銀甕盈前庭
列駟騎後苑羅傾城寵極妬心起歡餘驕氣生田竇巧
相奪蕭韓互摧傾快意在一時報復延戈兵范睢掉柔
舌穰侯去彊羸寧知幽燕客接踵夸雄鳴茫茫前車轍

遺跡猶未平胡為不自悟坐使憂患并二疏獨何人千載垂令名

上山采薜蘿

上山采薜蘿山峻路迢遞下山逢故夫悲風生羅袂憶昔結髮時願得終百年變故不可期中道相棄捐蓮實生水中石榴生路側未嘗掛齒牙中心豈能識上山采薜蘿羅袖生芳菲因君贈新人莫遣秋霜霏落葉辭故枝不寄別條上白日無回光誰能不惆悵

雙桐生空井

雙桐生空井井空桐葉稀葉稀不自蔽鳳鳥將安歸雙
桐生空井井泥泉不出桐根日夜枯何由伐琴瑟

美女篇

南國有美女粲粲玉雪顏眉目豔華月色映清秋寒粉
黛不敢浣佩服惟幽蘭一朝備選擇得廁金宮班貞心
恥自銜望幸良獨難況蒙衆女妬倩笑誰為歡恒恐芳
桂枝寂寞零露溥素手發瑤琴泠泠奏孤鸞宮商合要

妙遺響風珊珊大音世罕識日暮空盤桓
安得託宵夢
集君瑤臺端相思不可極躑躅起長歎

玉階怨

長門燈下淚滴作玉階苔年年傍春雨一上苑牆來

秋思

梧桐生碧砌密葉暗金井驚心昨夜月照見棲禽影

長門怨

白露下玉除風清月如練坐看池上螢飛入昭陽殿

宛轉歌

星稀月白河閭干飢蟲顓號莎草寒美人望月歌宛轉
瀟湘水碧蒼梧遠愁魂一夜不得歸化作斷雲天際飛

長相思

長相思在沅湘九疑之山鬱蒼蒼青天蕩蕩林木暗落
日虎嘯風飛揚欲往從之水無航仲尼有德而不用孟
軻竟死於齊梁松柏摧折桂生蠹但見荊棘如山長長
相思斷人腸

雉子班

雉子班飛脩脩鳴鷺鷺踉蹌出沒灌莽中袞裳煥爛頰
瞳瞭野人拄翳潛置媒和聲相應無驚猜黃間一發激
流電錦繡披裂委草萊林棲野啄本無累嗜欲沈溺禍
所胎君不見天池鳳凰食竹實逍遙至和永終日

朗月行

朗月何朧朧照我綺牕中牕中美人不能寐起看玉宇
生秋風秋風飄飆吹木末纖雲卷盡懸明月明月隨風

出海來海水蕩漾龍鱗開寒光噴浸碧落外白浪湧作
金銀臺何處悲風怨羌管誰家舞榭笙簧暖長信宮中
漏水長昭陽殿裏更籌短漏長更短總含情開窗坐視
河漢傾廣寒宮在何處欲往從之渺烟霧青離汗漫不
可期桂華如雪東方曙

大牆上萬行

牆上萬方春擢秀何茫茫炎天六月旱無雨枝葉枯死
隨飄風世情翻覆不可擬人生有身莫依倚君不見樊

將軍一朝函首西入秦又不見劉越石仰天長歌握中
壁三士自殘因二桃子胥終棄吳江濤世人見機苦不
蚤何不看取牆上蒿

雞鳴曲

日將出雞先鳴千門萬戶聽雞聲美人錦帳愁欲曙壯
士苦心煎百慮人間百年能幾日日日雞鳴催日出
一朝過了復一朝白髮蕭蕭此生畢齊妃播淑德感彼蟲
薨薨周宣悟姜后功業光中興亦知國家共如此莫恠

雞鳴催早起

邯鄲才人嫁為廝養卒婦

邯鄲有才人，豔色如朝霞。
嫁作廝養婦，雲鬢埋泥沙。
憶昔趙王全盛日，夜夜綺筵張。
寶瑟中山美酒盈，羽觴一笑黃金滿。
千鎰繁華過眼如，轉蓬故宮禾黍秋。
茫茫明珠白壁走函谷，墜簪遺珥空悲風。
人生最苦是衰老，白首無歸向誰道。
葦門夜永月光寒，卧聽鴛鴦鬢枯草。

出塞

居延風高榆葉空狼烟夜照甘泉宮將軍授鉞虎士怒
蚩尤亘天旗尾紅麒麟前殿催賜酒已覺此身非已有
猛氣遙將日逐吞壯心肯落嫖姚後雁門城外沙如雪
玉帳霜濃鐵衣折長劍須披瀚海雲哀笳莫怨天邊月
北風烈烈刁斗鳴回看北斗南方明驚箭離弦車在坂
不勒燕然終不返

入塞

狐裘蒙茸沙磧裏望見玉關驚且喜關門候吏記曾逢

白髮相看淚如水歸來放馬咸陽原舊遊今有幾人存
斜陽慘淡照籬落閒看鄰翁戲子孫

孤兒行

蓬頭跣足誰家兒滿面塵埃雙淚垂爺娘棄我不待老
骨肉無人但兄嫂兩身一氣不相知陌路茫茫向誰道
清晨采薪日入歸殘羹冷飯難充飢欲言問兄兄不顧
嫂是他人更奚訴人生一世為弟兄同根自合同枯榮
爺娘在日曾眷戀願兄回看死人面

病婦行

夫妻結髮期百年何言中路相棄捐
小兒未識死別苦啞啞向人猶索乳
箱中探出黃金珥付與孤兒買餐餌
不辭瞑目歸黃泥泉下常聞兒夜啼
低聲語郎情不了願郎早娶憐兒小

淮南王

淮南王好神仙澄心鍊炁守自然
收拾真一歸中圓化為五色黃金丸
乘風駕景飛上天飛上天逍遙遊八鸞

金史卷一百一十五
卷一
捧轂龍翼輶虹蜺續紛夾綵旂上窺九陽下六幽回頭
大笑武皇帝柏梁桂館空清秋

蜀國弦

胡笳拍斷玄冰結湘靈曲終斑竹裂為君更奏蜀國弦
一彈一聲飛上天蜀國周遭五千里峨眉峒峒連玉壘
岷嶺出水作大江地老天浮戒南紀舒為五色朝霞暉
慘為虎豹嗥陰霏翕為千嶂雲雨入噓為百里雷霆飛
白鹽雪消春水滿谷鳥相呼錦城暖邑姬倚歌漢女和

楊柳壓橋花纂纂銅梁翠氣通青嶺碧雞啼落天上星
山都號風寡孤泣杜鵑鳴咽愁幽冥商悲羽怒聽未了
窮猿三聲巫峽曉瞿塘噴浪翻九淵倒瀉流泉喧木杪
樓頭仲宣羈旅客故鄉渺渺音塵隔含悽更聽蜀國音
不待天明頭盡白

昔昔鹽

楊柳正萋萋門前碧草齊別離如昨日白髮滿春閨飄
花兼淚落行雲逐望迷綠苔凝履跡粉汗浥書題夢到

龍沙北魂銷馬邑西
卷簾雙燕入開鏡一鷺啼腸共吳
江繞眉將楚岫低
攀枝憐並蒂窺沼妬雙棲
躍水寧無劍通天亦有犀
那看明月夜登樓感馬蹄

東飛伯勞歌

南飛鷓鴣北飛鵲
黃昏鳴雞白日燭珊瑚
石上栽兔絲
鴛鴦獨宿枯桑枝
永夜涼蟾入羅幕
蟬翼不如秋鬢薄
寒塘露蓮千葉紅
可憐零落空隨風

雙燕離

雙燕營巢時雙飛復雙語輕盈柳陌風振迅芹塘雨巢
成近繡幃雙宿更雙飛為蒙主人愛不信有睽違四月
溫風起榴花發紅蕊拾蟲還哺雛出入無停晷五月教
雛飛繞巢舞烏衣側避蛛絲過斜紫柳線歸六月雛翼
老分飛各相保脈脈傍珠簾依依集蘭橈世事有轉旋
陵谷一朝遷昆明延劫火甲第化歌烟帶睡驚飛出風
沙兩相失死生不得知嫵婉從茲畢回看舊主人粉黛
成灰塵天高雲渺渺海闊波鱗鱗荏苒朝還暮惻惻向

何處毛凋半夜霜淚滴三春露露寒霜又濃憔悴不成
容同心諒難隔魂魄終相從

烏棲曲

霜華着樹成秋蕊樹頭棲烏驚夜起起向幽閨啼數聲
閨中美人泣到明

吳宮烏啼夜已分宮中不聞人盡聞夜深風落茱萸子
沈沈漏斷啼烏死

三洲曲

三洲洲上花柳春三洲浦裏多商人酒旗紅袖明江閣
客船只望洲邊泊

八月風吹洲上樹樓船却向江西去紅粧送別各沾巾
驚動新來江北人

武陵深行

武陵溪一何深水有射工射人影陸有丹蛇長百尋嗟
哉武谿不可臨溪之水深且闊鳥不敢飛龍不敢越海
氣連天日月昏茵露着人肌肉裂嗚呼丈夫寧能沙場

百戰死有骨莫葬武谿水

遠如期

遠如期近別尚云可遠期能不悲憶昔辭君出門去手
種庭前松柏樹樹令成器人未歸洞房白髮秋霏霏高
原有梧隰有櫓待君北邙山石下

大提曲

大堤女兒顏如花大堤堤上無豪家東家女作西家婦
夫能棹船女沽酒春去秋來年復年生歌死哭長相守

君不見襄陽女兒嫁荊州
撞鐘擊鼓烹肥牛
樓船一去無回日
紅淚空隨江水流

明月子

朱閣綺疏瓊作戶
明月照人秋
獨苦桂花吹冷眠不成
誰家高樓絃管聲
倚樓空望別離處
唯有清光自來去
月圓正好缺復催
人生見月能幾回

短歌行

來日苦短去日苦長
日長不自覺日短令人傷
君不見

望後月又不見霜中蕊清光縱好魄已虧芳心欲動根
先死少年不知老可悲衰老却憶少年時

長安道

長安道送盡芳菲到枯槁人生衰盛苦不常何異長安
道傍草漢家將軍初拜官門前上客車班班一朝世衰
烟燄歇車輪無聲馬跡絕明年有詔封冠軍依舊車馬
來如雲

隴頭水

隴頭水征夫淚征夫之淚滴隴頭化為水入秦川流水
流向秦川嗚咽嗚不已何因得天風吹入君王耳

秋宵吟

玄蟬催秋入湘簾芙蓉露浴胭脂淡銅烏叻水添夜長
碧草歛愁歸寒蟬羅帳無人五更雨梧桐驚啼白楊語
春光爛漫不得知霜露淒涼奈何汝

車遙遙

車遙遙馬謁謁不知何人始作車長與人間載離別回

金史卷一百一十五
卷一
風吹起羅帳塵低頭恨殺作車人

陽春歌

帝車東指淑景昭冶容冉冉生寒條枯根相顧一時起
陽春只在霜雪裏枝頭候禽鳴滑滑暖烟日夜催花發
蜂喧蝶競方及時風雨宿昔成離披人間但見陽春好
未識陽春有枯槁

鳴雁行

雛雛鳴雁鳴達旦舉翼相連拂雲漢平原漠漠生野烟

雁飛只向江南天江南十月多禾黍一半輸官半供汝
明年二月歸養雛雛成又望江南去

獨不見

暖烟漾春杯色紫膩雨摧紅出花蕊蝶飛撩亂燕飛輕
嚶鳴相應俱有情有人抱瑟上高閣坐對粧臺彈別鶴
曲終顧影還徘徊東風自吹羅帳開

梅花落

種梅長江邊歲晚花始發東風為愛桃與李却使孤芳

金少卿八
卷一
坐銷歇美人高樓深紫霞捲簾一見長嘆嗟世間有榮
即有悴君不見海中碧樹終無花

折楊柳

去年送君楊柳春暖風晴日花冥冥今日思君瑣窗綠
柳條又綴黃金粟君心却似條上花隨風飄蕩不思家
妾心已作科上槁縱得春光為誰好折取長條寄遠人
人生四十無青春

秋夜月

秋夜月黃金波照人哭
照人歌人哭月長好月缺
月圓人自老

棗下何纂纂行

棗初作花時纂纂臨路岐
八月棗成實累累曜朝日
棗花纂纂蜂蝶翻棗實累累人滿園
嚴風蕭瑟枯葉飛蜂蝶不來人亦稀

白苧詞 二首

鏗華鐘伐靈鼓青娥彈絲白苧舞
文竿迎風雉振羽長

袖奮迅若雲舉博山霧合春濛濛玉釭搖火生長虹翠
蕩紅翻如夢中

暖香結暝嬌青春釵珠壓光照人鳳簫十二烟霧勻
鴻驚燕嬌波龍鱗玉觴交飛酒如沼門外斜陽在林杪
宮中沉沉天未曉

蛺蝶行

軟芳晞露春鮮妍上有蛺蝶飛翩翩暖風扶暝撲天起
翠重紅輕迷欲死東園無花留不住相隨又過西園去

沉沉斷夢失韓憑却抱霜華怨秋曙

釣天樂

君不見天穆之山二千仞天帝所以觴百靈三嬪不下
兩龍去九歌九辯歸杳冥我忽乘雲夢輕舉身騎二虹
臂六羽指揮開明闕帝關環佩泠泠曳風雨明月照我
足倒影搖雲端參差紫鸞笙響震瑤臺寒我欲聽之未
敢前空中接引皆神仙烟揮霧霍不可測翠葩金葉光
相射鯨鐘虎簾鏗鴻濛撼昆侖兮殷崆峒揚天桴兮伐

河鼓咸池波兮析木風遂升泰階朝玉帝側身俯伏當
瓊陛訊曰太極拆裂為乾坤紛紛枝葉皆同根胡為妄
生水火金木土自使激搏相熬煎臣聞三皇前羣物咸
熙熙衆子戴一父皞皞無偏私忽然元氣自蕩瀟變換
白黑分賢癡蚩尤與黃帝從此興戈矛流毒萬萬古爭
奪無時休骨肉自殘賊帝心至仁能不憂帝不答臣心
迷風師咆哮虎豹怒銀漢洶湧天雞啼風輪撇捩三島
過海水盡是青玻璃神奔鬼恠惕驚起遺音泚泚猶在

耳夢耶遊耶不可知但見愁雲漠漠橫九疑

周小史

婉孌周小童冶容敵花紅鮮雲委綠髮明星炯雙瞳采
蘭澧水湄挾彈長陵東擲果閑春市卷衣嬌金宮流盼
溢華彩言笑生芳風常恐秋露零瑤草成哀蓬食桃坐
翻覆倩笑徒為工繁華豈不好不知身所終吾聞濟川
楫乃屬植鰭翁悠悠萬世下德業光無窮

結襪子

昔有信陵君乃在大梁城親為貴介弟位冠諸侯卿傾
家待國士倒屣延豪英詣門謁朱亥虛左上侯嬴袖椎
奪兵符救趙蜚英聲河外走蒙驚宗社賴扶傾於今不
可見寂寞傷人情

拔蒲三首

拔蒲清川渚水淺蒲不長自非排風羽莫羨凌雲翔
拔蒲江水湄終日不盈把嫌殺紫鴛鴦雙戲蒲葉下
拔蒲復拔蒲織作波紋簾無處寄相思秋風露蓮淡

從軍五更轉

一更戍鼓鳴市上斷人聲風吹鴻雁過憶弟復思兄
二更月上城照見兜鍪光側身望山川淚落百千行
三更悲風起樹上烏鵲鳴枕戈不能眠荷戈繞城行
四更城上寒刁斗鳴不歇披衣出戶視太白光如月
五更星斗稀霜葉光爛爛健兒爭先起拂拭寶刀看

前有尊酒行

前有尊酒芳以飴舉杯欲飲且置之丈夫有志可帥氣

胡為受此麴蘖欺禹惡旨酒玄德上達桀作酒池而南
巢是蔡商辛惡來以白日為夜糟丘肉林相枕藉瑤臺
倏忽成灰塵流毒猶且遷殷民夫差酖而納施楚國酣
而放屈姑蘇臺上麋鹿遊鄢郢宮中狐兔出灌夫罵坐
禍延魏其竹林稱賢神州疾藜亡家破國有如此酒有
何好而嗜之前有尊酒釀以清酌之白日成晦冥眼花
耳熱亂言語元氣耗斁肝膽傾乃知酒是喪身物衛武
之戒所以垂休聲

公無渡河

丈夫不愛死成仁心所安殞身苟無故哀哉徒自殘水
能殺人人共知公獨茫然狂以癡黃河渺渺無津涯乃
欲絕流而渡之公也溺死人誰悲世路如何險惡實多
平地倏忽滔天風波利溼欲餌孰知其佗不見不聞縱
橫網羅固不必如公之癡可堪以魚中之鉞亦不必如
公之狂可會以伏甲之觴眼前言笑百媚出寧知兵刃
羅心腸公無渡河河無津瑩篴一曲愁殺人

隔谷歌

戰鼓咽悲風，弓折不可把。
弟兄隔谷，不相聞咫尺。
人間與泉下，丈夫誓許國。
殺身非所憐，兩心本一氣。
何能坐相捐，登埤四顧望。
慷慨肝膽裂，不見救兵來。
但見繞城鐵甲光，如雪飛禽在羅罔。
尚或念其飢，身為高官馬。
食粟忍見手足居重圍，相彼鴻與雁。
亦各顧匹儔，挽弓射一猿。
羣猿拔箭聲啾啾，鳥獸且有情。
人心獨何尤，嗚呼田家紫荊雖微木。
不忍聽君歌隔谷。

步虛詞

五首

太微啟靈宇紫殿含祥風
圓光照無外梵炁來沖融
仙人魚鱗次羽葆朝當中
離羅鬱蕭臺縹緲浮太蒙
泰階平六符文昌位三公
北斗運元化軒轅成歲功
稽首玉陛下逍遙樂無窮

鬱華開赤殿結鄰炫黃文
葳蕤爛霄漢照耀下土墳
東華蹕嚴駕西崦泮昏氛
神行肅疊疊象化陶醺醺
景風調垺北玉燭煥烟煴
冥茫密芴間歛忽幽朗分
萬靈仰

無私九真告成勲

重陽戕寶闕衆星拱高垣寥寥大虛庭巍巍無極尊白
虎伏右駢青龍承左轅玄武後躡踞長離前騰騫黃靈
正常居萬有歸一元希微眇梯粟浩蕩彌乾坤高卑各
奠位神化無窮源

步虛歸太一精心覲樞庭浮浮回極運湛湛規中清五
神謹訶衛六位肅救寧東溟升陽曜西海生陰靈炎光
熿玄室湧醴液朱陵駸駸麤穢除綿綿淳粹凝妙用無

邊方攝身遊帝青

焚香禮玄梵肅駕朝紫宸游雲結華蓋鮮飈翼飛輪披
烟上閣道佩月攀鉤陳服食丹霞漿嗽嚙甘露津琅琅
歌洞章寂感虛皇嘖飄飄廣莫風舒嘯青林春沆瀣六
合外永與無始隣

氣出唱

今日不樂振策遠遊東上泰山巍何修修道逢仙人要
我同仇蒸霞為糧烹玉為羞玄英素蕤光華蔓流日觀

菡萏葩華九州令我從之身輕若浮道以五鸞翼以兩
虬朝翔玄圃夕止蓬丘謁見王母雲眉月眸青娥三千
或舞或謳風吹琅玕聲如鳴球雜花並開莫知春秋洪
崖先生勸我此留自揣凡骨非仙者儔七情交煎一觸
百抽又病懣僻無藥可療崇崇清宮蕩無涯陬列仙如
沙不少一漚王母笑聽拜謝扣頭歸來山林曷標曷鉤
熙熙泰和長樂無憂

班婕妤

昭陽秋清月如練笙歌嘈嘈夜開宴長信宮中辭輦人
獨倚西風詠紉扇傾城自古有褒姒紅顏失寵何須怨
泠泠玉漏掩重門一點金釭照書卷

神絃曲

紫桂飄香九萬里三山地色如凝水水妃宵冷不能眠
金簪素指敲冰絃冰絃泠泠玉泉滴貝闕棲蛟泣幽碧青瞳
小髻歌繁霜飛風起江低昂瞳矐紫燄出海樹天清
月落空相望

短歌行

涼風西來天氣清雲飛水落山崢嶸髮膚剝削稜骨生
鮮芳菸邑成枯莖百蟲哀號百竅鳴凡有形色皆不平
成之孔艱壞厥輕羈人含愁起夜行列星滿天河漢橫
繁思攢心劇五兵天高何由達其情歸來託夢通精誠

長歌行

秋夜夜長月照軒夢見天神與我言曜靈循環周四垣
四時迭代成寒溫枯榮生殺相為根我於萬物何怨恩

生丁其時命所存六淫洶湧無鍵閣由其弗約離其魂
春葩敷夏實繁外美中瘁誰能捫風霜涸寒肅不騫
納華收真歸本元掃滌浮穢夫何冤我今與女開女昏
生生殺殺無窮源歛女肯蓄守女門扶桑赫赫升朝暉

燕歌行

霜飛動地燕草凋沙飛石走天蕭條江河倒影陵谷搖
白日慘淡晝為宵美人迢迢隔雲霄青冥無梯海無橋
魚枯雁死星芒消沉沉思君不自慘愁如驚風鼓春潮

歲云暮矣山寂寥梧桐葉落空乾條崑崙層城阻且遼
蒼梧九疑烟霧遙瓊田瑤草芟蕞蕘江離澤蘭成艾蕭
登高望遠肝肺焦安得羽翼搏長飈

江南弄七首

江南細水細綺波江南綵女雛鳳歌凝嚔引睇紆青蛾
紆青蛾舒窈窕網軒繡戶鎖嬌春不放杜鵑來木杪
雄龍呼雌江底鳴山搖谷殷江波驚餘音不斷隨風征
隨風征入湘竹截玉鑽星吹向天楚江六月無炎燠

湖波澄明日色鮮
畫鷁相隨出采蓮
嬌紅曼綠鬪春妍
鬪春妍倚徘徊
今朝花盡且歸去
明日更有新花開
河曲懸匏渭濱竹
碧鮮削出藍田玉
輕翎參差飛羽謾
飛羽謾幽簧含丹
櫻瑤筍調清吹月
明紫鳳來毵毵
采菱女子木蘭船
翠裾紅袖青玉鈿
搖光蕩影惜嬋娟
惜嬋娟愁夕暉
拔蒲歌斷鯉魚入
歸去芰荷香滿衣
江草萋萋春渺渺
江臯出遊多窈窕
輕霞衣裳碧雲嫋
碧雲嫋紅日斜
鴛鴦飛過綠渚去
東風吹落菖蒲花

巫山宮堯巫峽長瑤姬出舞朝雲翔翠葩腰娘金支光
金支光丹葉詠寶難為使鳳為驂去雨來風樂無極

步出夏門行

步出夏門遙望滄海九河茫茫碣石安在魚龍瀟灑日
月晻藹三山何所弱水浼浼羲和曷往鼇極孰宰發鴻
之羽其心不改安期不死桃實可待悠哉沛乎歌以永
慨

丹霞蔽日行

彤霞何煌煌蔽此白日色炎埃被九野照灼后土赤朱
陵開火府嬉爛相蕩射山蒸絳紅氣川瀉丹砂液穹玄
變光曜衆草相烜赫迴迷河林舊高奪昆侖碧鬱華不
能神踰鳥已化魄女媧在青天歲莫還鍊石

烏生八九子

樹上烏一生八九子相呼鴉鴉聒人耳何不學銜泥燕
和鳴集桃李又不學鷹與隼奮翅高飛碧雲裏胡為巢
此庭樹間啄腐吞腥饕餮紫少年挾彈如流星禍機潛

發不見形翅摧折身首磔螻螳傷殘誰女惜

猛虎行

君不見昔者牛哀病七日化作猛虎形躩踞衣裳佩帶
換毛尾棄置衽席眠茅茨怒牙出吻目閃電頃刻不識
妻與兒昨日燈前相笑語豈意今朝化為虎嗚呼世上
茫茫化虎人祇應化心不化身

行路難 二首

君不見水上漸往來倏忽隨波移又不見花上蜂東枝

飄落尋西枝世人食葵不食蕖莫倚結交心匪石君不見避席武安人即是當年竇家客

君不見白石光不照幽草心又不見石上雲膚寸遂成陰世間會合良難得況有巧言能爍金伏波臺葬魏碑仆當時豈是非知音智謀啟疑忠逆耳平地反掌生崎嶇行路難愁最深

野田黃雀行

野田雀喙啄啄朝食山下禾暮食山上粟千百為羣叢

薄裏忽然驚飛若蜂起飛飛却落稻田中衆口齊啄稻
為空農夫力田望秋至沐雨梳風盡勞瘁王租未了私
債多況復爾輩頻經過野田雀鷹隼高翔不女擊農夫
田父愁何極

何當行

念離莫悲歌悲歌慘於哭思鄉莫望遠望遠傷心目九
疑迢迢隔湘川空山落日啼杜鵑梧桐摧折鳳凰去蛟
蜃出没波滔天令我四顧心茫然淚如懸崖瀉流泉樊

桐有路到玄圃何當飛墮王母前

射虎詞

長戈如林夾弓弩言向深山射猛虎獠兒蒙鶻走如風
所過犬羊皆為空紛紛散入人家宿丁男上山婦女哭
前行聞虎心先畏一虎當頭萬夫棄折弓墜刃委如土
却向人前作威武

苦哉行

雞不可使守門狗不可使司晨驅車梁弱水日暮空悲

辛我欲乘風謁闔闔虹蜺彌天雲霧合九關虎豹森駭
人長跪陳辭閣不答錯石作璵璠鬼神驚見欺截梁為
樽櫨般垂拊膺淚交頤衝風結玄冰道惡不可履巫咸
上天去澤凍神著死我欲竟此曲此曲多苦聲鴻雁回
天北因之寄遐情

起夜來

微月就沒銀河爛城烏啞啞夜將半憂愁不寐攬衣起
仰看明星坐待旦威弧歷落連天狼兩旗欲動風不揚

槐根王侯夢未覺
豈知雞聲堪斷腸

長相思

長相思
妾在天南君在北
紅顏未必無人知
葑菲不美君玉食
相思迢迢隔天河
長夜不眠愁奈何
欲憑魂夢到君所
君門九重虎豹多
長相思向誰道
涼風日夕吹桂枝
可惜馨香暗中老

無愁果有愁曲


君不見陳家天子春
茫茫後庭玉樹凝
冷光樓船江上

走龍陣宮中只報平安信酒波灩灩蒸粉香暖翠烘烟
妬嬌鬢無愁老夫貂鼠裘降旗搖動臺城秋生綃束縛
檻車去始信人間果有愁

妾安所居

憶昔嫁君時紅顏豔春華今與君別離明珠化為沙女
兒嫁夫願偕老何異青菰纏蔓草一枝一葉俱有心生
死長當兩縈抱誰言妾心君不知芳蘭委棄同蒺藜妾
欲有言君不見君車遙遙妾空戀君家大宅荒路隅可

怜棄妾安居



誠意伯文集卷一